

Ohmächtigi Brieder

2004

Grienabfuehr

(mit yygstreite Ladärnevärslu in rot-blau)

Du nimmsch root, und yych wähl grien,
Dr Schorsch stimmt fir die Schwarze.
Wie immer, wenn mir wähle mien,
Git s Stryt, duet s bin ys harze.
Zum Gligg wünsch nid no aine bruun.
Die schregglic Farb vom Volkstribuun.

*Wenn dr Zubi alles yyneloot
Seht nur dr Glatzkopf Gross nid root*

„D Hauptsach blybt zerscht d Fraue-Quote,
Und d Couleur isch doch Näbesach.
Drum bruuche mir, kan y do roote,
Im Männerclub e Frau vom Fach.“
Das sait dr CEO, e Herrli,
„Uns längt e Beeri, s bruucht kai Beerli.“

*D Emine warnt dr Sohn bim Goo:
„Uf Pariser darfsch Di nie verloo.“*

In Bärn git s nimme Linggi, Rächti,
S zellt nimme schwarz, rot, grien und grau.
S git numme Fraue oder Schlächti,
Und haime fahre alli blau.
Wenn sy d Promille-Gränze sängge,
Mien d Reet zerscht an sich sälber dängge.

*Wird s Team zem Lauf uf d Pischte gschiggt:
Denn sait dr Muri, „D Lischte zwiggt.“*

In Basel muesch uf s Fetzli setze.
S isch root en vogue, die Farb isch digg.
In Fetz-root strahlt s Casino jetze,
Uf Fetz-Root loost sogar dr „Bligg“.
Nur d „BaZ“ entlosst, ersetzt, wird tyyr,
Dr Wärt singgt unter s Altpapier.

*„Hee, Streller!“, herrsch dr Gegner tobe,
„Het s bi Dir scho Schnee dert obe?“*

„Root wird guet zu Basel passe“,
Saisch Du, „die heggschti Baiz isch root.“
Root isch d Farb vo unsr'e Kasse.
Und vom FCB, wo alli schloot..
Bim EHC duets ähnllic strahle:
Root d Ladärne, reeter d Zahle.

*Me schiggt zwelf Pinggt, das spir y,
Als Entwigglicshilf uf Ziry.*

„Schwarz“, sait dr Schorsch, „isch s Hockey-Dress
Vom Team, in Richtig Käller fahrt s.“
Schwarz passt zer EHC-Tristesse.
Dr Rettigsueli haisst au Schwarz.
Dä waiss, wie Basel z hälfe isch:
Root d Latärne, grien dr Tisch.

*Bim Dribble isch s im Haki glunge,
E Knibbel z Dribble in sy Zunge.*

Do sag y grad: „Mir wähle grien.“
Wie d Trämli, die hänn jetzte Bai,
Will sy uf em Trottoir rase mien.
Us Angscht laufsch uf de Schiine hai.
Kasch uf dr grieni Zwaier schysse,
Nimmsch gschyder non e Zwaier Wysse.

*Im Haki nitzt au kai Gedribbel
Är lest sich nimm, dä kaibe Knibbel.*

„S isch grien“, hersch do vom heggschte Hogger,
„Und kaini schwarze, kaini roote.“
In aim Punggt losst dr Chef nid logger:
„Es fählt ys jetzt no d Frau fir d Quote.“
Ganz Fraue-los wär s jo zem Gruuse
Wär neiht die nei, grien Waggis-Bluse?

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge
Deert ka men au alli Zeedel und Schnitzelbängg,
d Blaggede und dr Rädäbäng kaufe.